

四庫全書

經部

欽定四庫全書

詩傳旁通卷七

元 梁益 撰

小雅彤弓之什

彤弓

大飲賓曰饗

晉郤至謂楚子反曰諸侯間於天子之事則相朝也
於是乎有享宴之禮享以訓恭儉宴以示慈惠恭儉
以行禮而慈惠以布政間平聲謂諸侯當王事間缺

之時也饗禮有四諸侯來朝則饗之王親戚及諸侯之臣來聘則饗之及饗宿衛者老孤子也饗有體薦設几而不倚爵盈而不飲肴乾而不食立而不坐依尊卑以爲之獻數畢而止孔穎達曰饗者烹太牢以飲賓

爲已私分

莊子天地篇不徇一世之利以爲已私分不以天下爲已處顯顯則明萬里一府死生同狀

兵賜弄臣

漢哀帝賜侍中董賢武庫禁兵執金吾母將隆奏言
武庫兵器天下公用古者方伯專征乃賜斧鉞漢家
邊吏距寇賜武庫兵今便辟弄臣而以天下公用給
其私門建立非宜以廣驕僭非所以示四方也母音
巫姓也便音駢辟音僻

賜鐵券

楚漢春秋高帝初封侯者皆賜丹書鐵券曰使黃河

如帶泰山如礪漢有宗廟爾無絕世自漢以下功臣
賜鐵券至唐而跋扈之臣賜鐵券以堅其心唐以鐵
券賜河中節度使李懷光懷光怒曰人臣反賜鐵券
懷光不反亦賜鐵券耶是使懷光反也已而果叛

屯膏

易屯九五屯其膏象曰屯其膏施未光也程子傳曰
膏澤不下及是其德施未能光大也人君之屯也

解體 成公八年左氏傳季文子曰四方諸侯其誰

不解體解體謂有離叛心

印剗不予

史記韓信曰項王見人恭敬慈愛言語嘔嘔音吁人有

疾病涕泣分食飲至使人有功當封爵者印剗弊忍

不能予此所謂婦人之仁也酈生曰項王非項氏莫

得用事爲去人刻印剗而不能授剗者五官切謂剗

斷無復廉鐸也

彤弓旅弓

書文侯之命彤弓一彤矢百盧弓一盧矢百盧玃通
黑也左傳僖公二十八年晉文公敗楚於城濮獻功
於王王饗醴命晉侯宥賜彤弓一彤矢百玃弓矢千
敵王所愾見文公四年孔穎達曰此詩獨言彤弓者
以二文皆先彤後玃舉重可包輕故直言彤弓 賜
弓矢 禮記王制諸侯賜弓矢然後征

九伐之法

周禮夏官司馬以九伐之法正邦國馮弱犯寡則責

之馮音憑 青所景切賊賢害民則伐之暴內陵外則壇之壇音

善野荒民散則削之負固不服則侵之賊殺其親則

正之放弑其君則殘之犯令陵政則杜之外內亂烏

獸行則滅之行下孟切註曰青瘦也謂四面削其地也伐

有鍾鼓曰伐壇謂置之空墀之地別立其次賢者削

謂削其地侵謂兵加其境而已正謂執而正其罪殘

謂殺之也杜謂杜塞使不得與鄰國交通滅誅滅去

之也

拜表輒行

東晉穆帝永和二年十一月都督荆梁等州軍事桓
溫帥師伐漢拜表即行三年三月漢主李勢降溫素
有不臣之志及克蜀之後遂專制朝廷李氏據成都
國號漢即行即輒行言上表即出師不俟朝廷可否
也

菁菁者莪

五貝爲朋

前漢書食貨志王莽居攝變漢制元龜距冉長尺二

寸直二千一百六十爲大貝十朋

距其
呂切

公龜九寸直

五百爲壯貝十朋侯龜七寸以上直三百爲公貝十朋

子龜五寸以上直百爲小貝十朋是爲龜寶四品大

貝四寸八分以上二枚爲一朋直二百一十六壯貝

三寸六分以上二枚爲一朋直五十公貝二寸四分

以上二枚爲一朋直三十小貝寸二分以上二枚爲

一朋直十不盈寸二分漏度不得爲朋率枚直錢三

是爲貝貨五品。距至也。再龜甲緣去也。度入背兩邊

緣尺二寸也。兩貝爲朋。孔穎達詩疏漢書以大貝

壯貝。公貝小貝不成貝爲五也。鄭氏因經廣解之言

有五種之貝。其中以相與爲朋。非總五朋爲一朋也。

六月 先儒以此以下爲變小雅

建未之月

濮斗南曰詩言四月維夏六月徂暑則爲夏正可知

是建未之月也

戎車

鄭康成箋戎車革輅之等其等有五周禮春官車僕掌戎路之萃廣車之萃闕車之萃革車之萃輕車之萃鄭康成註萃猶副也此五者皆兵車所謂五戎也戎路王在軍所乘廣車橫陳之車闕車所用補闕之車革猶屏也革車所用對敵自蔽隱之車輕車所用馳敵致師之車也廣古曠切光之去聲陳與陣同革薄經切又薄田切屏井領切輕遣政切

韎韍

韎赤色韍熟皮左傳云有韎韍之跗注韎韍戎服跗
注亦戎服蓋以赤色熟皮爲戎服也韎音暮拜切跗
音敷

司馬法

司馬法仁本篇冬夏不興師所以兼愛民也

毛馬物馬

周禮夏官校人掌王馬之政凡大祭祀朝覲會同毛

馬而頒之凡軍事物馬而頒之鄭氏註毛馬齊其色也物馬齊其力也頒授當乘之

吉行師行

荀子大畧篇吉行五十犇喪百里漢文帝元年有獻千里馬者帝曰驚旗在前屬車在後吉行日五十里師行三十里朕乘千里馬獨先安之於是還其馬與道里費而下詔曰朕不受獻也其令四方毋求來獻

焦穫

宋敏求長安志櫟陽縣焦獲澤在縣北亦名瓠口爾雅十藪周有焦獲郭璞曰今扶風池陽縣瓠中是也詩獫狁匪茹整居焦獲謂此也史記鄭國鑿涇水自仲山西邠瓠口爲渠水經註曰涇水東南流經瓠口鄭白二渠出焉鄭國水工姓名邠與抵同櫟音藥秦櫟陽唐萬年今爲咸寧

千里之鑄

孔穎達正義曰劉向上疏來歸自鑄我行永久千里

之鎬猶以爲遠鎬去京師千里顏師古曰非豐鎬之鎬

太原

實沈封於大夏是爲參今太原陽曲舊晉陽也參爲大夏沈與沉同按韻音審

直壯律臧

春秋傳晉子犯曰師直爲壯曲爲老 易師之初六師出以律否臧凶臧善也不以律善亦凶

附衆威敵

史記晏嬰薦田穰苴曰穰苴雖田氏庶孽然其人文能附衆武能威敵

采芑

奭

路車有奭之奭許力切音興之入聲與召公名奭之音異召公奭音釋

芑

芑有二此詩之芑傳言菜也大雅文王有聲豐永有
芑之芑傳言草也此詩之芑陸璣草木疏曰芑菜似
苦菜莖青白色摘其葉白汁出脆可生食亦可蒸爲
茹青州人謂之芑西河鴈門芑尤美胡人戀之不出
塞朱子曰即今苦蕒菜後魏賈思勰齊民要術曰芹
蓐其呂切江東人呼爲蕒芹蓐收根種之常足水忌潘
泔及鹹水澆之則死性繁茂而甜脆白蓐尤宜糞歲
歲可收潘泔米水也故云潘泔 潘音番字袁切泔

音昔

新田菑畝

孔穎達詩疏曰田一歲曰菑二歲曰新田三歲曰畝
釋地文菑者災也畝和柔之意也孫炎曰菑始災殺
其草木也新田新成柔田也畝和也田舒緩也郭璞
曰今江東呼初耕反草爲菑

婁領

春官巾車註婁領之鈞婁隴王切音縷繫也 樊

樊蒲官切音盤大帶馬飾也

葱衡

記玉藻三命赤芾葱衡周禮公侯伯之卿三命

治兵振旅

鏡鐻

左傳臧僖伯曰三年而治兵入而振旅歸而飲至以
數軍實振整也收也數所矩切計也

鏡音叟似鈴鐻音濯似小鐘皆鉦也

地官鼓人以金錡和鼓以金鐻節鼓以金鏡止鼓以

金鐸通鼓注曰鐸音淳鐸于也圓如碓頭大上小下
樂作鳴之與鼓相和鐸鉦也形如小鐘軍行鳴之以
爲鼓節鏡如鈴無舌有柄執而鳴之以止擊鼓鐸大
鈴也振之以通鼓鼓人無鉦之文而鐸鐸鉦皆鉦
之屬故并紀之

車攻

傳

毛傳齊毫齊力齊足皆爾雅釋畜之文

宣王時未有鄭

周宣王母弟桓公友封於鄭其地在京兆鄭縣桓公之子武公滑突隨平王東遷遂居河南之新鄭其地在滎陽宛陵西南宣王時未有河南之鄭也圃田澤後爲鄭之原圃

教

教山名左傳晉師救鄭在教郟之間郟丘交切音敲杜預云教郟二山在滎陽縣西北

鳥

毛傳鳥達屨鄭箋金鳥黃朱色孔疏屨人注鳥有三等赤鳥爲上冕服之鳥也下有白鳥黑鳥此金鳥即赤鳥也故箋云金鳥黃朱色加金爲飾赤鳥則尊莫是過故云達屨言赤鳥是屨之最上達者也此鳥也而謂之屨屨鳥通名耳

時見殷見

春官注曰時見者言無常期也殷猶衆也

擘

柴與擘同。子智切。積也。凡薪禽之積皆曰柴。故許慎說文作擘。謂積禽也。

決拾飲

毛傳：決，鉤弦也。拾，遂也。飲，利也。鄭箋：飲，謂手指相次比也。孔疏傳以飲爲利，其義不明。故申而明之。決，著於右手大指。所以鉤弦開體。遂著於左臂。所以遂弦。手指相比。次然後射。得知利。故毛云：飲，利謂相次然。

後射利非訓飲爲利也 夏官繕人注挾天子用象
骨拾講扞也以其遂絃故亦名遂 決 古註九經
本作決周禮繕人作挾即芃蘭之鞮大射之朱極三
也

夜軍中驚

西漢景帝三年吳楚反周亞夫以中尉爲太尉東擊
吳楚既會兵滎陽東北走秦昌邑堅壁不出而使輕
騎兵弓高侯等絕吳楚兵後食道吳兵乏糧饑欲挑

戰終不出夜軍中驚內相攻擊擾亂至於太尉帳下
太尉終卧不起頃之復定弓高侯韓績當也績與顏
同挑徒了切

乾豆賓客充君之庖

禮記王制天子諸侯無事則歲三田一爲乾豆二爲
賓客三爲充君之庖乾居寒切鄭氏註曰三田者夏
不田獵也惟春秋冬三時田獵耳 公羊傳諸侯田
狩一曰乾豆二曰賓客三曰充君之庖何休註 一

者第一之殺也自左髛射之達於右髛中心死疾解
潔故乾而豆之中薦於宗廟髛音縹普沼切小腹兩
邊肉一云脅後髛前肉也髛音隅又音偶肩前也一
云肩前兩乳骨也射音石中音衆二者第二之殺
也自左髛射之達於右脾遠心死難故以爲賓客遠
于萬切三者第三之殺也自左髛射之達于右髓
中腸胃汚泡死遲故以充君之庖廚充備也髛音俾
又音陞股外也髛音香水賺也賺音歎苦簾切腰左

右虛肉處也腓與胃同泡與胞同普交切益愚按何
休鮮公羊第二殺與毛傳異毛公云射右耳本者次
之鄭康成云射當爲達謂達右耳本者次之也

面傷踐毛不成禽

孔穎達正義曰凡射獸皆逐後從左箱而射之面傷
謂當面射之踐音翦踐毛謂在傍而逆射之二者皆
嫌誅降之義不成禽不獻惡其害幼小此不能使獵
者無之自君所則不敢以示教法耳大獸公之非復

已物君賜使射故非中不取言嚮者田獵所取用勇
力今射者禮樂所取由辭讓也

每禽取三十

穀梁昭公八年傳禽雖多天子取三十焉其餘與士
衆以習射於射宮射而中田不得禽則得禽田得禽
而射不中則不得禽是以知古之貴仁義而賤勇力
也范甯註曰取三十以供乾豆賓客君庖射宮澤宮
也

澤宮

記射義天子將祭必先習射於澤澤者所以擇士也
已射於澤而後射於射宮射中者得與於祭不中者
不得與於祭鄭康成曰澤宮名也士謂諸侯朝者諸
臣及所貢之士也孔穎達曰澤宮言習射則未是正
射射於射宮乃行大射東匯澤陳雲住濫曰澤宮名
其所在未詳疏云於寬閑之處近水澤而爲之射宮
即學宮也

東有甫草駕言行狩章附見毛傳及孔頴達正義

毛傳曰甫大也田者大芟草以爲防或舍其中褐纏旃以爲門表纏質以爲楸間容握驅而人擊則不得入左者之左右者之右然後焚而射焉天子發然後諸侯發諸侯發然後大夫士發天子發抗大綏諸侯發抗小綏獻禽於其下故戰不出頃田不出防不逐奔走古之道也艾魚廢切音刈楸倪結切又魚列切與繫關同門中之闌也門下所限者謂之闕門中取

正者謂之闌抗舉也綏如錐切音蕤擊古詣切音計
握乙角切頃苦穎切孔氏疏曰大芟殺野草以爲防
限設防立門以織毛褐布纏通帛旃之竿以爲門兩
傍門南開並爲二門用四旃四褐以裹纏椹質爲門
中闌闌車軌之裏而邊約車輪者也門之廣狹兩軸
頭去旃竿之間各容一握握人四指爲四寸是門廣
於軸八寸也馳走入門不得徐也軸頭擊着門傍旃
竿則不得入所以罰不工也以天子六軍分爲左右

令各在一方屬左者之左門屬右者之右門不得越
離部伍教戰畢士卒出門乃驅禽於防焚草而射之
舉綏爲表因獻禽於下也戰場有頃數戰者不出界
椹知林切音砧軌音范車頭也綏解見秦駟職五射
有過軍表軍表即褐纏旃也

吉日

馬祖

周禮夏官校人

校音效

春祭馬祖夏祭先牧秋祭馬社冬

祭馬步鄭氏註曰馬祖天駟也孝經說云房爲龍馬
房星名也先牧始養馬者其人未聞馬社始乘馬者
馬步神爲災害馬者孔穎達詩疏曰謂之伯者伯長
也常祭在春將用馬力則又備禮禱之長上聲 周
禮疏賈公彥

差擇齊其足

爾雅釋畜曰既差我馬差擇也宗廟齊毫注云尚純
戎事齊力注云尚強田獵齊足注云尚疾郭景純注

爾雅又引毛公詩傳之文

漆沮之從

漆沮二水禹貢東會于涇又東過漆沮之漆沮孔安國云在涇水東一名洛水此與繇詩古公之自土沮漆異周禮職方氏雍州其浸渭渭洛是也或云沮一名洛鹽韋廊坊同皆州名廊音孚洛水亦經延安境又西自韋州流至廊州同州入河同華至河中府河瀆在焉

羣友

列女傳獸三爲羣古語獸二爲友身二爲朋

五齊

三酒

周禮天官酒正掌酒之政令辨五齊之名一曰泛齊
二曰醴齊三曰盎齊四曰緹齊五曰沈齊齊鄭康成
讀去聲音劑杜子春讀平聲音染 鄭氏註 泛者
成而滓浮泛泛然如今宜城醪矣泛芳斂切滓壯士
切緹之上聲 醴猶醴也成而汁滓相將如今恬酒

矣恬與甜同 盎猶翁也成而翁翁然葱白色如今
酳白矣酳白即今白醪酒也盎烏浪切翁鳴動切酳
當作醪並在何切 緹者成而紅赤如今下酒矣緹
音體 沈者成而滓沈如今造清矣沈沉同

三酒 辨三酒之物一曰事酒二曰昔酒三曰清酒
周禮註鄭司農云事酒有事而飲也昔酒無事而飲
也清酒祭祀之酒也玄謂事酒酌有事者之酒其酒
則今之醪酒也昔酒今之酋久白酒所謂舊醪者也

清酒今中山冬釀接夏而成醪音亦鄭司農鄭衆也
玄鄭康成名

鴻鴈

勞者歌其事

韓詩外傳男女有所怨恨相從而歌饑者歌其食勞
者歌其事

庭燎

司烜物百枚束之

周禮秋官司烜氏凡邦之大事共墳燭庭燎烜音毀
共音恭鄭氏註故書墳爲蕢鄭司農云蕢蜀麻燭也
玄謂墳大也樹於門外曰大燭於門內曰庭燎皆所
以照衆爲明

物百枚束之 禮記郊特牲曰庭燎之百由齊桓公
始也註云僭天子也庭燎之差公五十侯伯子男皆
三十天子用百孔氏曰古制未得而聞要以物百枚
并而纏束之今則用松葦竹灌以脂膏也

辨色

禮記玉藻朝辨色始入謂昧爽既明之後目視五色可辨之時也

沔水

朝宗

周禮春官大宗伯春見曰朝夏見曰宗秋見曰覲冬見曰遇時見曰會殷見曰同鄭氏註此六禮者以諸侯見王爲文朝猶朝也欲其來之早宗尊也欲其尊

王觀之言勤也欲其勤王之事遇偶也欲其若不期而俱至朝直遙切音潮朝也之朝張遙切音昭

祈父之什

上

祈父

祈父薄違

書酒誥圻父薄違圻父政官司馬也謂之父者尊之也薄違圻父迫逐違命者也孔穎達曰古者祈圻畿同字得通用故此詩作祈尚書作圻

司右

五兵

夏官司馬之屬司右掌羣右之政令凡軍旅會同合其車之卒伍而比其乘屬其右凡國之勇力之士能用五兵者屬焉羣右者戎右齊右道右也齊仄皆切五兵司馬法弓矢圍父矛守戈戟助凡五兵長以衛短短以救長

虎賁

司馬之屬虎賁氏掌先後王而趨以卒伍軍旅會同

亦如之 司右註右謂勇力之士充王車右賁音奔
與犇同虎賁勇猛犇突之意

越勾踐伐吳

越勾踐伐吳大徇於軍曰有父母者老而無昆弟者
以告勾踐親命之曰我有大事子有父母者老而子
爲我死子之父母將轉於溝壑子爲禮已重矣子歸
沒而也汝父母之世後若有事吾與子圖之 勾踐越
王名徇示也

魏公子救趙

魏公子無忌號信陵君公子將晉鄙軍勒兵下令曰
父子俱在軍中父歸兄弟俱在軍中兄歸獨子無兄
弟歸養得選兵八萬人進擊秦軍秦軍解去遂救邯
鄲存趙 邯鄲趙建都之地

戰于千畝

國語周語曰宣王三十九年戰于千畝王師敗績于
姜氏之戎張守節史記正義曰千畝原在晉州岳陽

縣北杜元凱左傳註曰西河介休縣南有地名千畝
諫靈王

太子晉諫靈王之詞見國語周語韋昭註曰自厲王
暴虐而流宣王不務修農而料民幽王昏亂而以滅
西周平王不能修政至於微弱禍敗不止以宣王連
數云厲宣幽平

薪水之勞

陶潛爲彭澤令不以家累自隨送一力給其子與書

曰汝旦夕之費自給爲難今遣此力助汝薪水之勞
此亦人子也可善遇之 淵明名 古今言陶潛字淵
明然益觀淵明記其外祖孟嘉萬年遺事自稱淵明
先親記尊者事不應自稱已字當是一名淵明而字
元亮也

不敢斥王

斥者指斥之謂明白指其人其事而言之今不敢言
王之過而責司馬故云不敢斥王也大雅文王篇傳

言以戒王而不敢斥言猶所謂敢告僕夫云爾左傳
虞人之箴曰獸臣司原敢告僕夫不敢指斥言官箴
王闕但云告於僕夫從者也

白駒

留客投轄

漢陳遵字孟公嗜酒每大飲賓客滿堂輒闔門取客
車轄投井中雖有急終不得去

藿

小宛中原有菽毛公傳云藿也禮韻云藿大豆葉也
菽者衆豆之總名豆於百穀之數其種二十於九穀
之中則居其二其角謂之莢其葉謂之藿元魏張揖
廣雅曰大豆菽也小豆荅也荅得合切賈思勰齊民要
術曰大豆生於槐小豆生於李大麥生於杏小麥生
於桃其生實又爲農祥故梅桃杏實多者來歲爲之
穰師曠占術曰五木者五穀之先欲知五穀但視五
木蓋五果分五行所以表五穀也嚴坦叔曰藿用以

作羹

大者王小者侯

史記田儋傳田橫懼誅與其徒屬五百餘人入海居
島中高祖聞之使上使去赦田橫罪而召之曰田橫
來大者王小者乃侯耳不來且舉兵加誅焉橫來與
客二人乘傳去詣洛陽未至三十里尸鄉廐置遂自
剄客奉其頭從使者馳奏之高帝拜二客爲都尉以
王禮葬橫既葬二客穿冢旁自剄餘伍百人在海中

聞橫死亦皆自殺田橫兄弟能得士也劉古頂切割
頸而死也

我行其野

畜

畜養之畜許六切畜聚之畜敕六切畜聚亦作蓄聚
許六切者一音吁玉切宋時諱避不用

六行教民

周禮地官司徒以鄉三物教萬民而賓興之一曰六

德智仁聖義中和二曰六行孝友睦婣任恤三曰六藝禮樂射御書數鄭氏註曰物猶事也興猶舉也民三事教成鄉大夫舉其賢者能者以飲食之禮賓客之既則獻其書於王矣註六行曰善於父母爲孝善於兄弟爲友睦親於九族婣親於外親任信於友道恤賑憂貧者

相保相受

大司徒令五家爲比使之相保五比爲閭使之相受

鄭氏註曰保猶任也故書受爲授杜子春云當讀爲受謂民移徙所到則受之去則出之

不孝等刑

大司徒以鄉八刑糾萬民一曰不孝之刑二曰不睦之刑三曰不婣之刑四曰不弟之刑五曰不任之刑六曰不恤之刑七曰造言之刑八曰亂民之刑婣與姻同弟與悌同造言謂訛言惑衆者亂民謂執左道以亂政者

斯干

與突

與室之西南隅 突室之東南隅突一作突一作突
並鳥叫切音要又音杳詳見抑之屋漏

占六夢

周禮春官占夢掌其歲時觀天地之會辨陰陽之氣
以日月星辰占六夢之吉凶一曰正夢二曰噩夢三
曰思夢四曰寤夢五曰喜夢六曰懼夢季冬聘王夢

獻吉夢于王王拜而受之乃舍萌于四方以贈惡夢
註家之說曰正者無所感動平安自夢噩音鄂噩者
驚愕而夢思者思念而夢喜者喜悅而夢懼者恐懼
而夢聘問也贈送也舍音釋萌者菜始生舍萌猶釋
采也 陸農師曰人之精神與天地陰陽流通故夢
之吉凶各以類至

守至正

禮記禮運曰宗祝在廟三公在朝三老在學王前巫

而後史卜筮瞽侑皆在左右王中心無爲也以守至正
鄭氏註曰宗宗人也瞽樂人也侑四輔也

紡塼

朱子語錄曰瓦紡塼也瓦紡時所用之物舊見人畫
列女傳漆室女乃手執一物如今銀錠樣者意其爲
紡塼也黃東發曰今所見紡無用塼者而與塼亦
爲二物恐古今風俗不同爾嘗見湖州婦人各一瓦
覆膝而索麻線於其上歲久瓦率成坎古亦豈有此

事而詩人指之與

孟子之母

五飯

幕

中饋

劉向列女傳孟母鄒孟軻之母也孟母曰夫婦人之禮精五飯冪酒漿養舅姑縫衣裳而已矣故有閨門之修而無境外之志易曰在中饋無攸遂詩曰無非無儀惟酒食是議以言婦人無擅制之義而有三從之道也故年少則從乎父母出嫁則從乎夫夫死則從乎子禮也今子成人也而我老矣子行乎子義吾

行乎吾禮君子謂孟母知其婦道 列女傳不著孟
母姓氏名字

五飯五穀之飯

冪音覓其狄切蓋覆也

中饋 家人六二伊川易傳婦人居中而主饋

新宮 猛慙

儀禮燕禮升歌鹿鳴下管新宮笙入三成遂合鄉樂
合音閣左傳昭公二十五年宋公享昭子賦新宮昭

子賦車轄宋公宋元公昭子叔孫婁車轄即車牽也
猛慙多力慙胡甘切 第六章

彘

彘地名周夷王崩厲王立無道三十有七年王流于
彘史記周本紀曰厲王出奔於彘太子靜匿召公家
召公周公二相行政號曰共和共和十四年厲王死
于彘太子靜長於召公家二相乃共立之是爲宣王
周公召公世世有之

無羊

呵 其耳濕濕

爾雅釋獸曰牛曰齧郭璞注云食之既久復出嚼之也呵且之切音癡呵齧齧三字通陸農師曰牛病則耳燥安則溫潤而澤故古之視牛者以耳祭義大夫袒而毛牛尚耳

建旗建旄

春官司常王建太常諸侯建旂孤卿建旛大夫士建

物師都建旗州里建旗縣鄙建旄道車載旒旒車載
旌纛旃通用師都六鄉六遂大夫道車象路旂車木
路也九旗皆畫成物之象

節南山

譏世卿

公羊春秋隱公三年傳夏四月辛卯尹氏卒尹氏者
何天子之大夫也其稱尹氏何貶曷爲貶譏世卿世
卿非禮也

均平

弔

空

傭

朱子曰均本當從金如所謂泥之在鈎者按集傳訓均爲平世言鈎衡亦取其平也

不弔之弔如字又丁歷切

空苦貢切

昊天不傭傭均也敕龍切音衝嚴坦叔曰考字一音容傭者賃也此詩之傭音容則非

誦

家父作誦之誦歌誦也左傳僖公二十八年聽輿人之誦注云歌誦也家家伯采邑後爲家父

正月

申包胥

史記伍子胥傳吳兵入郢伍子胥求昭王不得掘楚平王墓出其尸鞭之三百申包胥使人謂子胥曰子之報讐其以甚乎吾聞之人衆者勝天天定亦能勝人申包胥求救於秦立於秦庭晝夜哭七日七夜不

絕聲秦哀公憐之遣車五百乘救楚敗吳於稷

子思衛侯

褒如

云旋

子思之言是孔叢子

褒如見後白華

云旋陸農師曰云者象雲氣回旋之形故釋云爲旋

燕雀處堂

吳薛瑒

詡

聘蜀漢後主還對吳景帝

孫休

曰入其朝不

聞直言經其野民有菜色臣聞燕雀處堂子母相樂

突決棟焚而怡然不知禍之將及其是之謂乎燕雀

處屋兩見呂氏春秋

闕

覽士容論一見赧王五十

六年孔斌言其說皆相類

剛日

吉日戊剛日也曲禮外事以剛日內事以柔日甲丙

戊庚壬剛乙丁巳辛癸柔外事治兵內事冠昏祭祀

詩傳旁通卷七

欽定四庫全書

經部
詩傳旁通卷八

詳校官監察御史臣盛嘉祐

通政使司副使臣莫瞻菴覆勘

總校官進士臣楊懋珩

校對官中書臣吳甸華

謄錄監生臣陸維新

欽定四庫全書

詩傳旁通卷八

元 梁益 撰

小雅祈父之什

下

十月之交

日食

春秋左氏傳昭公七年四月朔日有食之晉平公曰
詩所謂彼日而食于何不臧者何也士文伯對曰不
善政之謂也國無政不用善則自取譴于日月之災

故政不可不慎也 春秋自隱公元年至哀公十四年二百四十二年之中日食凡三十有六 孔穎達詩正義曰日食者月食之也何休云不言月食者其形不可得而覩故疑言日有食之周天三百六十五度四分度之一日月皆右行於天一晝一夜日行一度月行十三度十九分度之七二十九日有餘而月行天一周追及於日而與之會交會而日月同道則食月或在日道表或在日道裏則不食矣又歷象為

交食之法大率一百七十三日有奇為限然月先在裏則依限而食者多若月在表則依限而食者少杜預見其參差乃云日月動物雖行度有大量不能不少有盈縮故有交會而不食者或有頻交而食者此得之矣按朱子集傳取孔疏說謂月二十九日有奇而一周天又逐及於日而與日會陳尚德謂月二十七日有奇而周又二日有奇始與日會陳說在朱子語錄後 歐陽文忠公詩本義曰日君道也月臣道

也望而至於黃道是謂臣干君明則陽斯蝕之朔而
至於黃道是謂臣壅君明則陽為之蝕十月之交於
歷當食君子猶以為變詩人悼之然則古之太平日
不食星不孛蓋有之矣若過至未分月或變行以避
之或五星潜在日下禦侮以救之或涉交數淺或在
陽歷陽盛陰微則不蝕或德之休明而有小眚焉
昔
上則天為之隱雖交而不蝕四者皆德之所由生也
先儒又謂交而蝕陽微而陰乘之也交而不蝕陽盛

而陰不能掩也此則係乎人事所感蓋臣子背君父
妾婦乘其夫小人陵君子夷狄侵中國所感如是則
陰盛陽微而日為之食矣

日食分至說 左氏昭公二十一年秋七月壬午朔日
有食之公問於梓慎曰是何物也禍福何為對曰二
至二分日有食之不為災日月之行也分同道也至
相過也其他月則為災陽不克也故常為水 朱子
語錄曰橫渠說日月皆是左旋蓋天行甚健一日一

夜周三百六十五度四分度之一又進過一度日行
速健次於天一日一夜周三百六十五度四分度之
一正恰好被天進一度則日為退一度二日天進二
度則日為退二度積至三百六十五日四分日之一
則天所進過之度又恰周得本數而日所退之度亦
恰退盡本數遂與天會而成一年是謂一年一周天
月行遲一日一夜行三百六十五度四分度之一行
不盡比天為退了十三度有奇至二十九日半強恰

與天相值在恰好處是謂一月一周天進數為順天而左退數為逆天而右歷家以進數難算只以退數算之故謂之右行且曰日行遲月行速朱子又曰歷家只算所退之度却云日行一度月行十三度有奇此乃截法故有日月五星右行之說其實非右行也橫渠云天左旋處其中者順之少遲則反右矣此說最好書疏璣衡禮疏星回于天漢志天體沈括渾天儀皆可參攷天左旋日月亦左旋恐人不曉所以詩

傳只載舊說

歷家月行速

陳善

尚德日月行遲常以二十七日千

十六分日之三百二十七而與天會二十九日九百
四十分日之四百九十九而與日會一月一周天者
以與日會言也其實二十七日有奇而周二日有
奇始與日會文公註十月之交以為月二十九日有
奇而周天又逐及於日而與日會蓋未詳也 李迂
仲曰唐志云十月之交以歷推之在幽王之六年

時之豔妻即褒姒故定為幽王時

書疏璣衡

舜典在璿璣玉衡以齊七政孔穎達尚書正義曰在
察也釋詁文說文云璿美玉也玉是大名璿是玉之
別稱璣衡俱是玉飾但史之立文不可云玉璣玉衡
一指玉體一指玉名猶左傳云瓊弁玉纓所以變其
文孔安國傳以璿言玉名故云美玉其實玉衡亦美
玉也易賁卦象云觀乎天文以察時變日月星宿運

行於天是為天之文也璣衡者璣為轉運衡為橫簫
運璣使動於下以衡望之是王者正天文之器漢世
以來謂之渾天者是也馬融云渾天儀可旋轉故曰
璣衡其橫簫所以視星宿也以璿為璣以玉為衡蓋
貴天象也蔡邕云玉衡長八尺孔徑一寸下端望之
以視星辰蓋懸璣以象天而以衡望之轉璣窺衡以
知星宿是其說也七政其政有七於璣衡察之必在
天者知七政謂日月與五星也木曰歲星火曰熒惑

星土曰鎮星金曰太白星水曰辰星易繫辭云天垂象見吉凶聖人象之此日月五星有吉凶之象因其變動為占七者各有異政故為七政得失由政故稱政也舜既受終乃察璣衡是舜察天文齊七政以審己之受禪當天心與否也馬融云日月五星皆以璣璣玉衡度知其盈縮進退失政所在聖人謙讓猶不自安視璿璣玉衡以驗齊日月五星行度知其政是與否重審己之事也上天之體不可得知測天之事

見於經者唯有此璿璣玉衡一事而已蔡邕天文志云言天體者有三家一曰周髀二曰宣夜三曰渾天宣夜絕無師說周髀術數具在其考驗天象多所違失故史官不用惟渾天者近得其情今史所用候臺銅儀則其法也虞喜云宣明也夜幽也幽明之數其術兼之故曰宣夜但絕無師說不知其狀如何周髀之術以為天似覆盆蓋以斗極為中中高而四邊下日月旁行達之日近而見之為晝日遠而不見為夜

渾天者以為地在其中天周其外日月初登於天後入於地晝則日在地上夜則日入地下王蕃渾天說曰天之形狀似鳥卵天包地外猶卵之裹黃圓如彈丸故曰渾天言其形體渾渾然也其術以為天半覆在地上半在地下其天居地上見者一百八十二半強地下亦然北極出地上三十六度南極入地下三十六度嵩高山正當天之中極南五十五度當嵩高之上又其南十二度為夏至之日道又其南二十四

度為春秋分之日道又其南二十四度為冬至之日
道南下去地三十一度而已是夏至日北去極六十
七度春秋分去極九十一度冬至去極一百一十五
度此其大率也其南北極持其兩端其天與日月星
宿斜而迴轉此必古有其法遭秦而滅揚子法言云
或問渾天曰洛下閎營之鮮于妄人度之耿中丞象
之幾乎莫之能違也是揚雄之意以渾天而問之也
閎與妄人武帝時人宣帝時司農中丞耿壽昌始鑄

銅為之象史官施用焉後漢張衡作靈憲以說其狀
蔡邕鄭玄陸績吳時王藩晉世姜岌張衡又一人葛
洪皆論渾天之義並以渾說為長江南宋元嘉年皮
延宗又作是渾天論太史丞錢樂鑄銅作渾天儀傳
於齊梁周平江陵遷其器於長安今在太史書矣衡
長八尺圓周二丈五尺強轉而望之有其法也

禮疏星回于天

月令季冬是月也日窮于次月窮于紀星回于天數

將幾終歲且更始孔穎達禮記正義曰去年季冬日
次於玄枵從此每月移次他辰至此月窮盡還次玄
枵故云日窮于次去年季冬月與日相會於玄枵自
此月與日相會於他辰至此月窮盡還復會於玄枵
故云月窮于紀二十八宿隨天而行每日雖周一
匝早晚不同至此月復於故處與去年季冬早晚相
似故曰星回于天幾近也以去年季冬去今年季冬
三百五十四日未滿三百五十六日未得正終唯近

於終故云數將幾終 幾音祈又音機

漢志天體

西漢書天文志日有中道月有九行中道者黃道一
曰光道光道北至東井去北極近南至牽牛去北極
遠東至角西至婁去極中夏至至於東井北近極故
晷短立八尺之表而晷景長尺五寸八分冬至至於
牽牛北遠極故晷長立八尺之表而晷景長丈三尺
一寸四分春秋分日至婁角去極中而晷中立八尺

之表而晷景長七尺三寸六分此日去極遠近之差
晷景長短之制也去極遠近難知要以晷景晷景者
所以知日之南北也日陽也陽用事則日進而北晝
進而長陽勝故為溫暑陰用事則日進而南晝退而
短陰勝故為涼寒也故日進為暑退為寒若日之南
北失節晷過而長為常寒退而短為常燠此寒燠之
表也月有九行者黑道二出黃道北赤道二出黃道
南白道二出黃道西青道二出黃道東立春春分月

東從青道立秋秋分西從白道立冬冬至北從黑道
立夏夏至南從赤道凡君行急則日行疾君行緩則
日行遲日行不可指而知也故以二至二分之星為
候日東行星西轉冬至昏奎八度中夏至氐十三度
中春分柳一度中秋分牽牛三度七分中此其正行
也日行疾則星西轉疾事勢然也故過中則疾君行
急之感也不及中則遲君行緩之象也至月行則以
晦朔決之日冬則南夏則北冬至於牽牛夏至於東

井日之所行為中道月五星皆隨之也

沈括渾天儀

夢溪沈括存中精天文學東坡亦敬為大儒渾天儀之說漢晉天文志孔穎達書疏大畧已盡之蔡仲默書傳謂宋朝為儀三重其在外者曰六合儀次其外者曰三辰儀最在內者曰四遊儀四遊者東西南北無不周徧也沈括曰舊法規環一面刻周天度一面加銀丁蓋以夜候天晦不可目察則以手切之也古

人以璿飾璣疑亦為此蔡氏曰今太史局秘書省銅
儀制極精緻亦以銅丁為之

四分度之一日之一

陳壽翁曰四分度之一者周天全度外其零度有一
度四分中之一分也以對周歲全日外其零日亦有
一日四分中之一分所謂四分日之一也壽翁名櫟
新安人為蔡氏書傳纂疏

正陽之月

沈存中曰日食正陽之月先儒正謂四月非也正謂
四月陽謂十月王厚齋曰子由詩說與存中同 集
傳中蘇氏穎濱蘇子由也

春秋必書

春秋時日食隱公一桓公二莊公四僖公三文公二
宣公三成公二襄公九昭公七定公三凡三十有六
已見卷首此復出之

董子

董子董仲舒廣川人對漢武帝三策仕江都相

宰士

公羊傳天王使宰咺來歸惠公仲子之賵宰者何官也咺者何名也曷為以官氏宰士也何休註天子士以名氏通中士以官錄下士畧稱人 咺吁阮切 賵芳鳳切助喪之物車馬曰賵

蔡仲為卿士

左傳定公四年衛子魚曰管蔡啓商甚間王室王於

是乎殺管叔而蔡

放也

蔡叔以車七乘徒七十人

以車徒放

之也

其子蔡仲改行帥德周公舉之以為已卿士見諸

王而命之蔡

蔡放之蔡一作蔡桑葛切音撒甚音

忌謀也間音澗離也帥入聲

膳夫

天官屬掌王之食飲膳羞以養王及后世子

內史

春官屬掌王之八枋之灋以詔王治一曰爵二曰祿

三曰廢四曰置五曰殺六曰生七曰予八曰奪枋
與柄同兵病切

趣馬

夏官屬掌贊正良馬而齊其飲食簡其六節注云簡
差也差擇其馬以為六等

師氏

地官屬掌以媿詔王以三德教國子一曰至德以為
道本二曰敏德以為行本三曰孝德以知逆惡教三

行一曰孝行以親父母二曰友行以尊賢良三曰順
行以事師長居虎門之左司王朝掌國中丁仲切失之
事以教國弟子凡國之貴游子弟學焉注云媿與美
同告王以善道也虎門路寢門也中失之中杜子春
云中當為得記君之得失也餘見大雅雲漢

向

向音餉或云向姜國河陽西北三十五里有向城酈
善長云軹南四十五里向城軹在濟源地名向上闕

駟十三州志云軹縣南山西曲有故向城即周之向國皇父所作都于向者楚州承縣亦有向城乃莒國之向非河內之向

雨無正

昊天旻天

首章之首浩浩昊天不駿其德次云昊天疾威弗慮弗圖昊天旻天之辨說者引九經考異曰昊天疾威之旻天字元作昊天或併經與註改作旻天反謂旻

天者非孔氏疏云上有昊天此亦為昊天 考異

引孔疏

周官八職一曰正

天官宰夫掌百官府之徵令辨其八職一曰正二曰
師三曰司四曰旅五曰府六曰史七曰胥八曰徒註
云別異諸官之八職以備王之徵名所為正譬於治
官則冢宰也 胥平上二音

退遂

程子易大壯傳如羝羊之觸藩籬進則礙身退則妨角進退皆不可也

漢侍中

後漢書百官志侍中比二千石掌侍左右贊導衆事
顧問應對法駕出則多識者一人參乘餘皆騎在乘
輿車後或置或否註曰侍中員本八人舊在尚書上
今官出入禁中更在尚書下侍中與中官俱止禁中
武帝時侍中莽何羅謀逆由是出禁外有事乃入畢

即出莽何羅即馬何羅謀逆故改王莽秉政侍中復
與中官共上章帝時復出外獻帝初即位置侍中給
事黃門侍郎員各六人出入禁中近侍帷幄省尚書
事

小旻之什

小旻

作舍道邊

東漢博士曹褒請著漢禮班固以為宜廣集諸儒共

議得失章帝曰諺言作舍道邊三年不成會禮之家
名為聚訟互生疑異筆不得下昔堯作大章一夔足
矣乃拜褒侍中授以叔孫通漢儀十二篇曰此制散
畧多不合經今宜依禮條正使可施行

五事之德

洪範二五事貌言視聽思恭從明聰睿肅又哲謀聖
蔡氏書傳曰貌言視聽思五事之序恭從明聰睿五
事之德肅又哲謀聖五德之用也

小宛

齊壹

人之齊聖齊音整齊之齊彼昏不知壹醉日富壹專也專務酣飲也此嚴坦叔之說

步屈

步屈一名蠖許慎說文以為屈伸蟲易繫云尺蠖之屈以求伸也爾雅尺字作𧈧从蟲郭璞註以為蜘蛛揚雄方言以為蠨蛸其狀如蠶而絕小行則促其腰

使首尾相就乃能進步屈中有伸故名屈伸鄭康成
謂之屈蟲郭景純又謂之步屈今北方亦呼步屈老
則吐絲作蠶然不可用 螂音即蹴音促子六切蠶
在資切

蝮 蛉 螺 羸

螺字亦作蝸 陸農師埤雅曰果羸即今細腰土逢蠶
好禁蜘蛛說文云天地之性細腰純雄無子列子曰
純雄其名稚蜂蓋其類也 棟泥作房如併竹管取桑

蟲負之七日而化為子其祝聲可聽法言曰祝之曰類我蓋其音云也莊子曰細腰者化今呼大蜂啖子地中作房者亦曰土蜂非此細腰土蠶也果蠃一名螻蛄亦作蠃並音螻蛄音翁一名蒲盧中庸曰政也者蒲盧也化書曰嬰兒似乳母斯不遠也 南唐宋齊丘字子嵩化書曰揅泥揅音輦搬運也

嚴坦叔詩緝曰近世詩人取螺贏之巢毀而視之乃自有細卵如粟寄螟蛉之身以養之其螟蛉不生不

死蠢然在穴中久則螟蛉盡枯其卵日益長大乃為
螺羸之形穴竅而出蓋此物不獨取螟蛉亦取小蜘蛛
置穴中寄卵於蜘蛛腹脅之間其蜘蛛亦不生不
死久之蜘蛛盡枯其子乃成今人養晚蠶者蒼蠅亦
寄卵於蠶之身久之其卵為蠅穴蠶而出殆物類之
相似者

黃東發日抄曰震戌辰考試省闈聞同官宮教天台
董華翁朴云螺羸負螟蛉埋土中而寄子其身如鷄

抱子煖之而使生然其子即螺贏之子非以螟蛉之
子為子也詩之說得之揚子雲之說則失之耳時有
永嘉戴監簿伺聞其說亦云嘗親見蠨蛸負螟蛉入
筆管有兩蠨蛸互飛而共營之初非獨陽無子而外
取螟蛉之子為子也今按陸氏蒲盧之名戴氏筆管
之說則唐人有詩云窻裏日光飛野馬案頭筠管長
蒲盧其蠨蛸營子之謂耶獨陽無子穀梁莊三年傳
獨陰不生獨陽不生獨天不生三合然後生

犴獄

韓詩薛君章句鄉亭之繫曰犴朝廷曰獄薛君薛漢也亭道路所舍也 狴犴狴邊兮切犴犴同胡地野犬也所以守者故謂獄為狴犴 狴又音痞 路史少昊紀云乃立犴獄造科律聽獄訟執中為虞之士而天下亡寃封之于臯是曰臯陶

小弁

鷺

鶯雅鳥也雅鴉通平上二音

鴨

鴨鳥之鴨音匹又音卑鴨鳥亦名鴨鷓

屬

三章經文不屬於毛之屬音燭傳文毛膚體之餘氣
末屬此屬字音蜀

忍

六章維其忍之之忍當訓為殘忍之忍如左氏傳所

謂忍人也

德宗太子

唐郃國大長公主肅宗之女下嫁蕭升其女為德宗太子妃恩禮甚厚德宗貞元三年八月或告郃主淫亂且為厭禱德宗大怒幽之禁中切責太子太子懼請與妃離婚帝召李泌告之且曰舒王近已長立孝友溫仁泌曰陛下惟一子柰何欲廢之而立姪且陛下所生之子猶疑之何有於姪舒王雖孝自今陛下

宜努力勿復望其孝矣此大事願陛下審圖之自古
父子相疑未有不亡其國者帝曰為卿遷延至明日
思之泌抽笏叩頭泣曰如此臣知陛下父子慈孝如
初矣然陛下還宮當自審思勿露此意於左右露之
則彼皆欲樹功於舒王太子危矣帝曰具曉卿意間
一日帝開延英殿獨召泌流涕曰非卿切言朕今日
悔無及矣太子仁孝實無他也

巧言

忠言良藥

孔子家語六本篇孔子曰良藥苦於口而利於病忠
言逆於耳而利於行湯武以謬謬而昌桀紂以唯唯
而亡 沛公入咸陽意欲留居之樊噲諫不聽張良
曰忠言逆耳利於行毒藥苦口利於病願聽噲言

何人斯

蘇暴

蘇已姓子爵在夏曰伯懷州之武德有蘇古城在濟

源西北二里樂史寰宇記云蘇忿生之故邑也 暴

暴新公采鄭邑也 一曰隧世本云周圻內國名

陳

胡逝我陳堂塗謂之陳堂下至門之徑也陳風中唐
有甓廟中路謂之唐唐之與陳廟庭之異耳唐亦堂
下至門之徑也

字林

字林呂沈作以解字義張目即爾雅註中語

盱衡

漢書王莽傳盱衡厲色孟康註曰眉上曰衡盱衡者
舉眉揚目也盱許于切梁劉孝標絕交論見一善則
盱衡扼腕遇一才則揚眉抵掌 晉左太冲魏都賦
魏國先生有睟其容乃盱衡而誥李善註曰誥告也
本文作誥今集傳作語

祇

俾我祇也祇音祁支切鄭氏音止皮切祇字又作祇

無下一畫按無下一畫者正音祁支切

三物

犬豕鷄三物以詛鄭莊公詛射穎考叔者使卒出殲
行出犬鷄亦以此三物意古有其法爾

巷伯

孟子以讒被宮

漢書馮奉世傳班固贊馮參曰讒邪交亂貞良被害
自古而然故伯奇放流孟子宫刑張晏曰寺人孟子

賢者被讒見宮而作巷伯之詩也 墨劓荆宮大辟
謂之五刑宮為淫刑男子去其勢而為閹人婦人則

幽閉之

永巷

劉向列女傳周宣王姜后脫簪珥待罪永巷史記范
睢傳睢得見秦王於離宮佯為不知永巷而入其中
王來而官者怒逐之三輔黃圖曰永巷永長也宮中
長巷幽閉宮女之有罪者武帝時改為掖庭置獄焉

謂之掖庭詔獄

班固司馬遷贊

司馬遷薦李陵為將李陵戰敗降匈奴武帝怒處遷
宮刑下蠶室遷有報任安書自陳已志漢書司馬遷
傳班固贊曰嗚呼以遷之博學洽聞而不能以智自
全既陷極刑幽而發憤書亦信矣言任安書迹其所以自
傷悼小雅巷伯之倫夫惟大雅既明且哲能保其身
難矣哉孔穎達曰司馬遷以良史之才所坐非罪及

其刊述墳典辭多慷慨是以班固云小雅巷伯之倫
焉

谷風

焚輪

爾雅釋天曰風焚輪謂之積郭景純注云暴風從上
而下者積與頽同焚輪亦當時方言

蓼莪

諸蒿通

蒿 葭 莪 蔚 蘩 蕭 華 萋

卷八
蒿者衆蒿之總名蒿之言高也爾雅繁之醜秋為蒿
郭景純曰醜類也春時各有種名至秋老成皆通呼
為蒿也

鹿鳴食野之蒿傳云菽也即青蒿也菽音去刃切又
音牽去聲爾雅蒿菽注云今人呼青蒿香而中炙啖
者為菽

菘爾雅釋草曰菘蘿郭景純以為菘蒿亦謂之蘆音
凜
蒿陸璣以為蘿蒿又一名角蒿葉似薺蒿而細味似

萹蒿而香

蔚牡蒿也青蒿之也釋草以為牡蒿陸璣以為牡蒿
蓋蒿之雄而無子者三月始生七月着花八月為角
一名馬新蒿一名馬先蒿蔚有角而云無子者蓋今
之青蒿葉端皆作子如米許大蔚則無之是以謂之
牡蒿牡蒿也

繁白蒿一名皤蒿青蒿蓋蒿背之太白者白蒿乃蒿
背之白者耳

蕭亦青蒿爾雅蕭荻已見第三卷王風陸璣以為荻
蒿或以為牛尾蒿

葦蕒蕭亦名蕒蒿陸璣云葉青白色莖似箸而輕肥
蕒蒿爾雅釋草購蔕蕒舍人曰購一名蔕蕒郭景純
云蕒蒿也舍人漢時註爾雅者不載姓名有芸草者
謂之芸蒿蓋香草也江東茹為生菜呼七里香附見
於諸蒿之末云

王裒父死非命

魏齊王曹芳嘉平四年吳諸葛恪修東興堤魏司馬
昭與戰敗走司馬師弟昭爵東關之敗昭問僚屬
曰近日之事誰任其咎安東司馬王儀對曰責在元
帥昭怒曰司馬欲委罪於孤耶斬之儀子裒痛父死
非命隱居教授三徵七辟皆不就未嘗西向而坐廬
於墓側旦夕攀柏悲號涕淚着樹樹為之枯讀詩至
哀哀父母生我劬勞未嘗不三復流涕門人為之廢
蓼莪家貧計口而田度身而蠶人或饋之不受助之

不聽諸生密為刈麥哀輒棄之遂不仕而終

大東

駕謂更其肆

鄭康成曰襄駕也駕謂更其肆也從旦至暮七辰
一移因謂之七襄肆次也更平聲

啓明長庚箕斗

鄭漁仲曰啓明金星長庚水星金在日東故日將出
則東見水在日西故日將沒則西見 箕斗謂南斗

韓昌黎詩我生之辰宿直南斗牛奮其角箕張其口
揚州斗牛之墟指南斗也

四月

赤棟

所草霜狄二切

輶

攢車輪之木也

詩傳旁通卷八